

Projek Smart mampu atasi banjir Cheras

CHERAS: Warga kota tidak perlu lagi bimbang akan kemungkinan bandar raya ini menghadapi banjir kilat apabila Projek Pembinaan Terowong Pengurusan Air Banjir dan Lalu Lintas (Smart) siap sepenuhnya tidak lama lagi.

Timbalan Menteri Hal Ehwal Dalam Negeri, Datuk Tan Chai Ho, berkata difahamkan projek pembinaan terowong sepanjang 9.7 kilometer yang bermula sejak 1 Januari 2003 itu kini sudah 91 peratus siap.

Beliau yang juga Ahli Parlimen Bandar Tun Razak, berkata projek Smart yang dilaksanakan dengan usaha sama Jabatan Pengairan dan Saliran (JPS) serta Lembaga Lebuhraya Malaysia (LLM) itu dapat menampung 3 juta meter padu air untuk dilencongkan dari ibu kota ke kolam tadahan di Desa Water Park, Taman Danau Desa sebelum disalurkan ke Sungai Kerayong sekiranya Kuala Lumpur dilanda hujan lebat.

"Apabila siap nanti orang ramai tidak perlu bimbang dengan kemungkinan banjir kilat seperti yang berlaku di Johor pada masa ini," katanya pada taklimat berhubung perkembangan terowong itu di sini, baru-baru ini.

Hadir sama pada taklimat itu, Setiausaha Parlimen Kementerian Wilayah Persekutuan, Yew Teong Look dan Penolong Pengarah Lebuhraya Smart, Mohd Ridzuan Jahidin.